

Tempo cu turista ta djis bin drumi riba beach
a pasa pa historia

SOC FLORIN

en 9 Aña 2 Prijs: Awg 8,50

Minister Salud Publico
**SI AZV TA NIFICA
MI FIN COMO POLITICO
'SO BE IT'**

PA TIARA AIR
'AEROLINEA NACIONAL'
TA UN COS RIBA PAPEL

MEHRAN di Banco Central
**AINDA NOS TA SINTI
EFECTO DI BBO**

ADVERTI DESDE HULANDA CU ARUBA TA UN BURACO DI COLEBRA
Ni 1 aña despues & caba blanco di tur sorto di critica

HANS MOS

NI AMI OF MI FISCALNAN
LO LAGA NINGUN PARTIDO POLITICO GUIA NOS

- Consecuencia severo di impuesto den 2008 pa managernan
- Aruba 2025 ken su vision?
- Energia alternativa: un debate entre WEB y expertonan local
- Ru Croes 'riba e stul'

Control di trafico aereo keto bay den desbentaha

HANS MOS

Su estatura ya ta yama tur atencion riba dje, pero den e ultimo lunanan tur atencion ta riba Hans Mos (49) pa otro motibo, esta su posicion como Fiscal Mayor di Aruba. No por pasa un dia, sin su nomber aparece den medionan di comunicacion. Semper ta splica y kizas, te hasta, defende e posicion di Ministerio Publico.

Ni 1 aña na Aruba y
ya caba blanco di critica
**NO TA IMPORTA KEN
PERO SIN PRUEBA
NO POR PERSIGUI
NIUN HENDE**

Hans Mos no tin ni un aña na Aruba (el a bin Aruba na Mei 2007 pa reemplaza Karin Janssen), pero definitivamente e ta un periodo cu a pasa hopi lihe **"never a dull moment,"** e ta bisa, pero tambe hopi pisa. Ta 11 luna unda su bon sentido di humor a pasa testnan hopi fuerte.

"Aki tin hopi motibo pa ta pesimista." Pero asina mes Hans Mos, cu por competi bon cu Prome Minister Oduber pa uzo di dicho y expresionnan, no ta laga un momento pasa pa haci un 'joke,' y pone esnan cu ta traha cu n'e hari. **"Mi mester keda mira tur cos for di un punto di bista positivo."**

*Slangenkuil, mijnenveld,
wespennest*

Di otro banda, kico otro Hans Mos por a spera di su trabou nobo na Aruba? Na prome instante, nada. Pasobra, ora cu e vacatura a bin habri, y a pasa un peticion pa solicitud cerca fiscalnan na Hulanda pa e posicion di Fiscal Mayor na Aruba, Mos no a ni reacciona. E tabatin apenas un luna den su funcion nobo como Recherche Officier van Justitie na e 'Landelijke Parket', encarga pa sigura calidad den investigacion di recherche y Ministerio Publico. E tabata supervisa investigacionnan riba crimen organiza, entre otro e transporte internacional di cocaina. Den e sentido aki e

tabata conoce e situacion di nos region relativamente bon mirando cu Antiyas y Aruba ta keda mey mey di e ruta Sur America-Hulanda.

Ademas di cu Hans Mos a priminti su hefe e momento ey cu lo e keda por lo menos dos a tres aña den e funcion di Recherche Officier, e no a mira e posicion como Fiscal Mayor na Aruba como un promocion, sino djis un cambio na banda. Den otro palabra, e no a considera e posicion mes.

Pero, anochi na cas, ora di e conversacion usual entre parehanan riba con e dia di trabou a bay, Hans Mos a conta su casa di e peticion pa solicitud. Pa su sorpresa tabata su casa

kende a urgi'e pa considera e posicion na Aruba. Asina poco poco, sin yama mucho atencion, Hans Mos mester a bolbe pidi e peticion di solicitud (el a 'delete' esun cu el a haya). Pero ni e ora ey, el a keda impresiona cu e posicion, mirando cu e responsabilidad di Fiscal Mayor na Aruba, segun e descripcion di trabou, ta hopi limita, unda unicamente ta encarga cu e trabou di fiscalnan y investigacion policial.

Asina mes, e Procurado General encarga cu Asuntonan di Personal na Hulanda a aserca Hans Mos, y bis'e cu e tin e cualidadnan necesario pa e funcion di Fiscal Mayor na Aruba y esaki a haci e diferencia. Mos a cumenza considera pa tuma e posicion, pero a combersa prome cu diferente otro funcionario cu a traha na Aruba, tanto Arubiano como no Arubiano.

Di e combersacionnan aki tres descripcion a resalta, e palabranan: *slangenkuil, mijnenveld, wespennest* (cuna di colebra, veld di mina, neish'i abeha). **"Awor cu mi ta aki, mi ta ripara berdad bo mester ta cauteloso cu locual bo ta haci y papia na Aruba."**

Atakenan personal

Un di e problemanan grandi cu Hans Mos tin na Aruba ta cu e ta haya cu segun tempo ta pasa, atakenan ta bira hopi personal. Coleganan den Ministerio Publico di Aruba a tuma e posicion cu nan no ta lesa tur cos den corant mas, pero pa Hans Mos esey no ta un opcion. **"Mi kier sa kico tur loke ta sali den corant. Mi no ta di acuerdo cu ta duna un refleccion yena cu color, di casonan di cual tin asina poco conocimiento di hechonan. Pero asina mes, e articulonnan ta bin cu opinionnan sin cu esakinan ta argumenta na un forma integro."**

Mos, kende na Hulanda a traha como Fiscal encarga cu Prensa, a bisa cu hopi hende no ta compronde cu aunke Ministerio Publico ta un instancia publico, e trabou di investigacion mes ta uno secreto. Mas ainda, pa Ministerio Publico por actua mester tin pruebanan contundente, y no por bay tras di opinionnan sin mas.

E Brug di Marisol

Un ehempel di e critica contra Mi-

nisterio Publico ta cu no a investiga e caso di Brug di Marisol. **"Si ta sospecha un Minister di a comete corrupcion, anto mester entrega keho. Pero no por kere cu un articulo den corant por conduci na un investigacion penal. Mi no ta reacciona tampoco riba un homber cu ta grita, cu un Minister a perhudik'e. Si e tabatin prueba, e mester a entrega keho na polis."**

Hans Mos te hasta ta pidi pa e persona en cuestion pasa na Ministerio Publico cu su pruebanan, pero esey no a tuma luga. **"Esey ta mustra un desconfianza pa polis y Ministerio Publico. Pa definicion, hende ta desconfia di nos. Si nos no haci locual cu hende kier nos ta robez."**

Nos no ta man largo di Minister Rudy Croes

Un keho constante cu tin ta cu Ministerio Publico ta e man largo di Minister di Husticia. **"Formalmente e ta nos hefe. Pero, e no por mete ningun momento den un investigacion penal. Ningun hende ta mira con dificil tin biaha nos ta haci'e pa e Minister."** Hans Mos ta ilustra cu tin biaha tin tensionnan fuerte entre Ministerio Publico y nan hefe, sigur ora ta trata por ehempel e asunto di pensioen di Procurado General. **"Sa tin diferencia di opinion fuerte cu e Minister y nos no ta sconde esaki tampoco. Pero publico no mester sa di esakinan. Pasobra, apesar di e tensionnan, mester sigui deliberacion constante cu Minister, pa inform'e di tendencia y desaroyonan. Pasobra esakinan lo rekeri cambio di maneho cu no ta tuma luga di un momento pa otro."**

Pero bou ningun circunstancia ta planea cu e Minister, kico lo haci den un caso penal. **"Por ehempel, p'esey mes nos no a avisa e Minister adelanta cu nos lo a re-aresta Joran van der Sloot. E tabata e prome pa haya sa, si."** Mas ainda, Ministerio Publico no por pone e Minister den un posicion cu constitucionalmente por perhudik'e.

E test mas grandi te cu awor pa su curashi a bin na momento cu Fiscal Mayor Hans Mos ta disfruta di un par di ora di descanso cu casa y yiu y ta



**Ministerio
Publico no tey
pa haci trabou
di Parlamento**

haya yamada riba un incidente serio unda ruman di e Minister, abogado pa pais Aruba, ex Minister di Husticia, miembro prominente di MEP y **“segun hende ta bisa, e homber mas poderoso di Aruba,”** esta mr. Hendrik Croes tabata envolvi. Tabatin un denuncia cu Croes lo a dal un polis cu su auto intencionalmente y despues a core bay. **“Ni den un storia por a imagina un caso unda Sr.Croes lo a dal un polis cu tabata den accion.”**

Hans Mos ta defende e cautela cu a uza den e caso aki, netamente pasobra di e posicion di Hendrik Croes. Mas halto posicion di un persona, mas duro e caida. **“Aunke cu nos ta tene cuenta cu factornan humano pa tur hende, un ciudadano comun lo no haya tur e atencion negativo aki cu por strob’e den su bida despues.”**

Pero, tambe den e caso aki, a sigui proceduranan corecto segun Mos, unda mester a warda prome pa un keho oficial, unda a acusa Hendrik Croes di no a sigui ordo di un polis y te hasta di dal’e cu auto y despues sigui core. E ponencia aki tabata sosteni pa declaracion di dos otro polis, cu tabata na e sitio. A base di e declaracion aki, cu a dreña varios ora despues di e incidente na Paradera, Hans Mos a pidi pa detencion di Hendrik Croes.

Na momento di e detencion, Hendrik Croes a acusa Hans Mos di a *‘sucumbi pa presion di sindicato di polis.’* **“Ta net e ora ey tambe mi a tende cu SPA a menaza cu si nos no detene Croes, cu nan lo para tur trabou. Esaki tampoco ta aceptabel. Ningun hende, ni polis, por influencia Ministerio Publico den su trabou penal.”**

Pega entre e reclamo di Hendrik Croes y presion di SPA, un biha mas Mos a scohe pa sigui e caminda di ley. E no por papia mucho di e caso ya cu ainda e ta bou investigacion.

Di otro banda, Hans Mos ta kere cu polisnan mester tabata mas pro-activo y unabez cu a mira un delito tuma luga unda a dal un polis y core bay, nan mester a sigui tras di e persona y arest’e mesora.

No tin caso sin prueba

Otro asunto cu a haya hopi atencion ta e caso di checknan di campaña pa Rudy Croes, a cambio di permiso di trabou. Esaki ta un caso cu Hans Mos a hereda, pero ta enfatisa cu Ministerio Publico a investiga profundamente. Te ainda ta haya e reclamo di oposicion na Aruba cu Ministerio Publico a *‘scohe’* pa defende Minister. Pero, e berdad ta otro, Hans Mos ta segura. E problema ta sinta cu esnan cu ta haci e acusacionnan ta bin cu storianan largo den medio di comunicacion, pero ora cu presenta na Ministerio Publico, e declaracion oficial ta djis un fraccion di locual nan a conta publicamente. Of te hasta nan ta cambia nan declaracion. **“Y nos no por cuminsa cu un caso penal sin prueba. Mi no ta exclui cu tin hopi caso dudoso, pero nos mester traha a base di prueba concreto.”**

E caso di checknan pa Minister Rudy Croes den otro palabra, no por a bira un investigacion penal pa motibo di falta di prueba, pero e no ta kita e impresion si cu aki no a actua den luz di bon gobernacion. Pero, control riba bon gobernacion no ta un tarea di Ministerio Publico, sino di Parlamento. Ta Parlamento mester controla Gobierno, y no mester pusha e tarea aki riba un Ministerio Publico cu ya caba ta trahando na unicamente dos tercera parti di locual e forza mester ta, te hasta sin un Procurador General.

“Si riba nivel gubernamental tin indicacion cu cos no ta bay bon, mesora ta grita corrupcion. Aki democracia y e control democratico mester dreña den wegá. Pero kico ta pasa, ta laga e control di parlamento un banda y mesora ta mira na Ministerio Publico. Casonan dudoso unda Ministernan ta envolvi mester keda aclarea den Parlamento. Mi ta ripara cu Presidente di Parlamento practicamente no ta duna espacio pa tal.”

Hans Mos ta compronde hopi di e frustracionnan di oposicion, pero si esnan envolvi no ta bin cu prueba fuerte a base di cual por traha un acusacion penal, no tin nada cu Ministerio Publico por haci. Y en todo caso, no ta husto pa ataca Ministerio Publico e ora. **“E comunidad aki ta asina divi-**

di, sea bo ta blanco of preto, geel of berde y bo no por haci nada cu esey. Nos ta para mey mey di cashi y muraya y mester fungi como arbitrario pa politica.” Den e sentido aki, Hans Mos ta kere cu hopi hende cu a perde confianza den e sistema democratico ta mira Ministerio Publico como e ultimo recurso. **“Ta spera demasiado di e funcion di Ley Penal. Ni Ministerio Publico ni ley por cumpli cu e expectativa halto aki.”**

Den e sentido aki Mos no ta compronde pakico Minister Wever, despues di a admiti un cargo di abuso fisico menor (pusha un hende cu consecuencia cu el a cay) no por a djis paga su boet di 500 florin, despues cu varios biaha a manda recorda e mandatario di esaki. **“Mi ta haya cu ta falta di sentido di responsabilidad como Minister pa pone Ministerio Publico den un situacion dificil. Ta un caso cu tabatin 30 luna keto y cu diripiente ami ta haya mi mes cu n’e. Segun mi experiencia, na Hulanda un Huez nunca lo acepta cu Ministerio Publico por a actua dejado asina, y no lo considera e caso admisible mas. Obviamente na Aruba, Huez ta pensa otro. Pero, ata’mi atrobe mester a carga cu berguenza pa fayonan organisatorio den un instancia cu ta bou asina presion constante.”**

Herencianan doloroso

Otro ‘herencia,’ ta e caso Fondo Desaroyo Nobo San Nicolaas y Natalee Holloway. Dos caso cu a afecta comunidad completo. En particular e forma inhusto con media Mericano a atende cu e caso Natalee Holloway y cu Aruba. E atakenan aki, hopi similar na locual Hans Mos ta describi cu ta pasa cu Ministerio publico, ta haci dolor, pasobra nan tabata hopi personal pa nos comunidad. Aunke cu ta un otro fiscal ta encarga cu e caso aki, Mos ta segura cu tanto e team investigativo di Aruba y esun di Hulanda a traha diligente y cu hopi dedicacion. Pero sin duda e atakenan inhusto a afecta specialmente e team di Aruba, cu a dedica asina tanto ora pa conclui e caso.

Paloke ta Fondo Desaroyo Nobo, Hans Mos lo yama bon bini cualkier

investigacion riba e forma con Ministerio Publico a anda cu e caso. Tur fiscal cu a traha riba e caso tabata Hulandes cu no tin ningun afiliacion cu un partido politico na Aruba.

“Ni ami, ni mi fiscalnan (incluso e fiscalnan local) lo no laga ningun partido politico guia nos. Ami semper lo haci mi trabou cu integridad. Y si algun no ta gusta esaki, mi no por haci nada al respecto. Dia cu mi no por wak mi mes den spiel mas, lo mi mester bay di aki.”

Never a dull moment

Aunke Hans Mos ta ambivalente pa e forma con comunidad ta mira e papel di Ministerio Publico, e ta considera e experiencia na Aruba ya caba como unico. E no tin pensa di duna su mes por venci na tur presion. Ni sikiera e presion di su trabou como Fiscal Mayor cu dos vacatura pa fiscal habri y tambe encarga cu un parti di e trabou di un Procurado General. Tin dos candidato local pa e posicion di fiscal, pero Gobierno no kier bay de acuerdo cu e salario pa cua tin un acuerdo firma entre Antiyas y Aruba.

Esaki ta exactamente e problema relaciona cu e pensioen di mr. Theresa Croes, cu ainda ta Procurado General, pero no ta funciona. Como tal, Hans Mos y e Abogado General Nico Jörg mester percursa cu e trabou di PG ta sigui. **“Pues, awor nos dos mester haci e trabou di tres persona.”**

Asina mes, Hans Mos, kende entre tanto a haci algun adaptacion di e structura di Ministerio Publico, pa haci'e un aparato mas eficiente y mas barata (falta e formalizacion; Consejo di Minister di Aruba mester aproba e structura nobo) ta sinti su mes bon na Aruba. E famia Mos a cuminsa haya su draai na Aruba, cu un grupo di amistad cu practicamente a bira un extension di e famianan cu nan a laga na Hulanda.

Su escohencia pa uza Fort Zoutman pa e potretnan di Florin ta pasobra e monumento aki ta simboliza e coneccion entre Hulanda y Aruba, ademá di ta uno solido cu no ta basha abou cu djis un pusha. 

Ami ta bin di un cultura parlamentario unda cada Minister mester duna cuenta pa cada un cos cu haci of bisa

